

舊五代史

一九

蘇子卿

PDG

舊五代史卷一百十五

宋司空同中書門下平章事薛居正等撰

世宗紀第二

顯德二年春正月辛未朔帝不受朝賀辛卯詔在朝文班各舉堪爲令錄者一人雖姻族近親亦無妨嫌授官之日各署舉主姓名若在官貪濁不任懦弱不理竝量事狀重輕連坐舉主乙未詔應逃戶莊田竝許人請射承佃供納稅租如三周年內本戶來歸者其莊田不計荒熟竝交還一半五周年內歸業者三分交還一分五周年外歸業者其莊田除本戶墳塋外不在交付之限

周書六

其近北地諸州應有陷蕃人戶自蕃界來歸業者五周年內來者三分交還二分十周年內來者交還一半十五周年來者三分交還一分十五周年外來者不在交還之限二月戊申遣使赴西京賜太子太師致仕侯益白文珂宋彥筠等茶藥錢帛各有差仍降詔存問壬戌詔曰善操理者不能有全功善處身者不能無過失雖堯舜禹湯之上聖文武成康之至明尙猶思逆耳之言求苦口之藥何況後人之不逮哉朕承先帝之靈居至尊之位涉道猶淺經事未深常懼昏蒙不克負荷自臨宸極已過周星至于刑政取舍之間國家措置之事豈

能盡是須有未周朕猶自知人豈不察而在位者未有一人指朕躬之過失食祿者曾無一言論時政之是非豈朕之寡昧不足與言耶豈人之循默未肯盡心邪豈左右前後有所畏忌邪豈高卑疏近自生間別耶古人云君子大言受大祿小言受小祿又云官箴王闕則是士大夫之有祿位無不言之人然則爲人上者不能感其心而致其言此朕之過也得不求骨鯁之詞詢正直之議共申裨益庶洽治平朕于卿大夫才不能盡知面不能盡識若不採其言而觀其行審其意而察其忠則何以見器略之淺深知任用之當否若言之不入罪實

在予苟求之不言咎將誰執應內外文武臣寮今後或有所見所聞竝許上章論諫若朕躬之有闕失得以盡言時政之有瑕疵勿宜有隱方求名寔豈尙虛華苟或素不工文但可直書其事辭有謬誤者固當舍短言涉傷忤者必與留中所冀盡情免至多慮諸有司局公事者各宜舉職事有不便者革之可也理有可行者舉之可也勿務因循漸成訛謬臣寮有出使在外迴者苟或知黎庶之利病聞官吏之優劣當具敷奏以廣聽聞班行職位之中遷除改轉之際卽當考陳力之輕重較言事之臧否奉公切直者當議甄升臨時蓄縮者須期抑

退翰林學士兩省官職居侍從乃論思諫諍之司御史
臺官任處憲綱是擊搏紕彈之地論其職分尤異羣臣
如逐任官內所獻替啟發彈舉者至月限滿合遷轉時
宜令中書門下先奏取進止三月辛未以李晏口爲靜
安軍其軍南距冀州百里北距深州三十里夾胡盧河
爲壘通鑑浚胡盧河在正月至三月始建軍額先是貝冀之境密邇戎疆居
常敵騎涉河而南馳突往來洞無阻礙北鄙之地民不
安居帝乃按圖定策遣許州節度使王彥超曹州節度
使韓通等領兵他徙築壘于李晏口以兵戍守功未畢
契丹眾尋至彥超等擊退之及壘成頗扼要害自是敵

騎雖至不敢涉河邊民稍得耕牧焉壬辰尙書禮部貢院進新及第進士李覃等一十六人所試詩賦文論策文等詔曰國家設貢舉之司求英俊之士務詢文行方中科名比聞近年以來多有濫進或以年勞而得第或因媒勢以出身今歲所放舉人試令看驗果見紕繆須至去留其李覃何曦楊徽之趙鄰幾等四人宜放及第其嚴說武允成王汾閻丘舜卿任惟吉周度張慎徽王翥馬文劉選程浩然李震等一十二人藝學未精竝宜勾落且令苦學以俟再來禮部侍郎劉溫叟失于選士頗屬因循據其過尤合行譴謫尙視寬恕特與矜容劉

溫叟放罪其將來貢舉公事仍令所司別具條理以聞
夏四月庚戌以內客省使李彥頽爲延州留後辛亥詔
應自外新除御史未經朝謝行過州府不得受館驛供
給及所在公禮乙卯詔于京城四面別築羅城期以來
春興役戊午以翰林學士給事中竇儀爲禮部侍郎依
前充職以禮部侍郎劉溫叟爲太子詹事癸亥以翰林
學士中書舍人楊昭儉爲御史中丞是月詔翰林學士
承旨徐台符已下二十餘人各撰爲君難爲臣不易論
平邊策各一首帝親覽之

宋史陶穀傳世宗謂宰相曰朕觀歷代君臣治平之道誠

爲不易又念唐晉失德之後亂臣黠將僭竊者多今中原甫定吳蜀幽并尙未平附聲教未能遠被宜令近臣

各爲論策宣導經濟之畧乃命承旨徐台符已下二十餘人各撰爲君難爲臣不易論平邊策以進其畧率以修文德來遠人爲意惟穀與竇儀楊昭儉王朴以封疆密邇江淮當用師取之世宗自克高平常訓兵講武思混一天下及覽其策欣然聽納由是平南之意益堅矣五月辛未廻鶻遣使貢方

物鳳翔節度使王景上言奉詔攻收秦鳳二州已於今月一日領軍由大散關路進軍次先是晉末契丹入晉秦州節度使何建以秦成階三州入蜀蜀人又取鳳州至是秦鳳人戶怨蜀之苛政相次詣闕乞舉兵收復舊地乃詔景與宣徽南院向訓率師以赴焉東都事略王討秦鳳溥傳世宗將薦向拱遂平之世宗因宴酌甲戌詔曰釋氏卮酒賜之曰成吾邊功卿擇帥之力也貞宗聖人妙道助世勸善其利甚優前代以來累有條

貫近年以降頗紊規繩近覽諸州奏聞繼有緇徒犯法
蓋無科禁遂至尤違私度僧尼日增猥雜剏修寺院漸
至繁多鄉村之中其弊轉甚漏網背軍之輩苟剗削以
逃刑行奸爲盜之徒託住持而隱惡將隆教法須辨臧
否宜舉舊章用革前弊諸道州府縣鎮村坊應有勅額
寺院一切仍舊其無勅額者竝仰停廢所有功德佛像
及僧尼並騰併于合留寺院內安置天下諸縣城郭內
若無勅額寺院祇于合停廢寺院內選功德屋宇最多
者或寺院僧尼各留一所若無尼住祇留僧寺院一所
諸軍鎮坊郭及二百戶已上者亦依諸縣例指揮如邊

遠州郡無勅額寺院處于停廢寺院內僧尼各留兩所
今後竝不得剏造寺院蘭若公王戚里諸道節刺已下
今後不得奏請剏造寺院及請開置戒壇男子女子如
有志願出家者竝取父母祖父母處分已孤者取同居
伯叔兄處分候聽許方得出家男年十五以上念得經
文一百紙或讀得經文五百紙女年十三以上念得經
文七十紙或讀得經文三百紙者經本府陳狀乞剃頭
委錄事參軍本判官試驗經文其未剃頭間須留髮髻
如有私剃頭者却勒還俗其本師主決重杖勒還俗仍
配役三年兩京大名府京兆府青州各處置戒壇候受

戒時兩京委祠部差官引試其大名府等三處祇委本
判官錄事參軍引試如有私受戒者其本人師主臨壇
三綱知事僧尼竝同私剃頭例科罪應合剃頭受戒人
等逐處奏聞候勅下委祠部給付憑由方得剃頭受戒
應男女有父母祖父母在別無兒息侍養不聽出家曾
有罪犯遭官司刑責之人及棄背父母逃亡奴婢奸人
細作惡逆徒黨山林亡命未獲賊徒負罪潛竄人等竝
不得出家剃頭如有寺院輒容受者其本人及師主三
綱知事僧尼鄰房同住僧竝仰收捉禁勘申奏取裁僧
尼俗士自前多有舍身燒臂鍊指釘截手足帶鈴掛燈

諸般毀壞身體戲弄道具符禁左道妄稱變現還魂坐
化聖水聖燈妖幻之類皆是聚眾眩惑流俗今後一切
止絕如有此色人仰所在嚴斷遞配邊遠仍勒歸俗其
所犯罪重者準格律處分每年造僧帳兩本其一本奏
聞一本申祠部逐年四月十五日後勒諸縣取索管界
寺院僧尼數目申州司攢帳至五月終以前文帳到
京僧尼籍帳內無名者並勒還俗其巡禮行脚出入往
來一切取便是歲諸道供到帳籍所存寺院凡二千六
百九十四所廢寺院凡三萬三百三十六僧尼係籍者
六萬一千二百人戊寅以刑部侍郎邊光範爲戶部侍

郎以前御史中丞裴巽爲刑部侍郎己卯刑部員外郎
陳渥賜死坐檢齊州臨邑縣民田失實也渥爲人清苦
臨事有守以微累而當極刑時論惜之戊子以沙州留
後曹元忠爲沙州節度使檢校太尉同平章事丙申禮
部侍郎竇儀奏請廢童子明經二科及條貫考試次第
從之六月己酉以曹州節度使韓通充西南面行營都
虞候丙辰以亳州防禦使陳思讓爲邢州留後庚申兩
京及諸道府州不得奏薦留守判官兩使判官少尹防
禦團練軍事判官如是隨幕己曾任此職者聽奏防禦
團練刺史州各置推官一員辛酉廢景州爲定遠軍癸

丑以前延州節度使袁義爲滄州節度使以前邢州節度使田景咸爲鄧州節度使秋七月丁卯朔以鳳翔節度使王景兼西南面行營都招討使以宣徽南院使鎮安軍節度使向訓兼西南面行營都監戊辰太子太傅魯國公和凝卒八月癸卯兵部尙書張昭太常卿田敏等奏議減祠祭所用犧牲之數由是圜丘方澤及太廟卽用太牢餘皆以羊代之丁未中書侍郎平章事判三司景範罷判三司加銀青光祿大夫依前中書侍郎平章事進封開國伯以樞密院承旨張美權判三司辛亥詔今後應有病患老弱馬並送同州沙苑監衛州牧馬

監就彼水草以盡飲齕之性庚子太子太師致仕趙暉
卒乙丑詔曰今後諸處祠祭應牲牢香幣饌料供具等
仰委本司官吏躬親檢校務在精至行事儀式依附禮
經大祠祭合用樂者仍須祀前教習凡關祀事宜令太
常博士及監察御史用心點檢稍或因循必行朝典九
月丙寅朔詔禁天下銅器始議立監鑄錢癸未以太子
賓客趙上交爲吏部侍郎以吏部侍郎于德辰司徒詔
並爲太子賓客乙酉詔文武百寮今後遇天清節依近
臣例各賜衣服辛卯西南面招討使王景部送所獲西
川軍校姜暉已下三百人至闕甲午潞州部送先擒到

河東兵馬監押程支等二百人至闕詔所獲西川河東
軍校已下並釋之各賜錢帛有差閏月壬子西南面招
討使王景奏大破西川賊軍於黃花谷擒僞命都監王
巒孫韜等一千五百餘人

案九國志李廷珪傳周師攻秦鳳以廷珪爲北路行營都

統高彥儔呂彥珂爲招討廷珪遣先鋒指揮使李進以兵據馬嶺分兵出斜谷營于白澗將腹背以攻周師又遣染院使王巒領兵出唐倉與周師遇蜀師敗走王巒死之而馬嶺斜谷之兵聞之皆退奔高彥儔與諸將謀退守青泥嶺由是秦鳳階成之地皆陷于周矣

癸丑秦州僞命觀察判官趙玘

以本城降詔以玘爲郢州刺史

宋史趙玘傳高彥儔出師救援未至聞軍敗因

潰歸玘閉門不納召官屬諭之曰今中朝兵甲無敵于天下自用師西征戰無不勝蜀中所遣將皆武勇者卒皆驍健者然殺戮遁逃之外幾無子遺我輩安忍坐受其禍去危就安當在今日眾皆俯伏聽命玘遂以城歸

順世宗欲命以藩鎮宰相先是帝以西師久次艱于糧

范質不可乃授郢州刺史

先是帝以西師久次艱于糧

運命今上乘駟赴軍前以觀攻戰之勢及廻具以事勢

上奏帝甚悅至是果成功焉甲子秘書少監許遜責授

蔡州別駕坐先假竇氏圖書隱而不還也冬十月庚午

召近臣射于苑中賜金器鞍馬有差辛未成州歸順癸

酉以給事中王敏爲工部郎戊寅高麗國遣使朝貢丁

丑右散騎常侍康澄責授環州別駕左司郎中史又立

責授商州長史左驍衛大將軍元霸責授均州別駕右

驍衛將軍林延禎責授登州長史澄等奉使浙中廻日

以私便停留逾時復命故有是責右諫議大夫李知損

配流沙門島坐妄貢章疏斥譴貴近及求使兩浙故也
己丑前太常卿邊蔚卒是月始議南征十一月乙未朔
以宰臣李穀爲淮南道前軍行營都部署知廬壽州行
府事以許州節度使王彥超爲行營副部署命侍衛馬
軍都指揮使韓令坤等一十二將各帶征行之號以從
焉己亥諭淮南州縣詔曰朕自續承基構統御寰瀛方
當躬已臨朝誕修文德豈欲興兵動眾專耀武功顧茲
昏亂之邦爰舉弔伐之義蠢爾淮甸敢拒大邦因唐室
之陵遲接黃寇之紛亂飛揚跋扈垂六十年盜據一方
僭稱僞號幸數朝之多事與北境以交通厚啟戎心誘

爲邊患晉漢之代寰海未寧而乃招納叛亡朋助凶慝
李金全之據安陸李守貞之叛河中大起師徒來爲應
援攻侵高密殺掠吏民迫奪閩越之封疆塗炭湘潭之
士庶以至我朝啟運東魯不庭發兵而應接叛臣觀釁
而憑陵徐部汴陽之役曲直可知尙示包荒猶稽問罪
邇後維揚一境連歲阻飢我國家念彼災荒大許糴易
前後擒獲將士皆遣放還自來禁戢邊兵不令侵撓我
無所負彼寔多奸勾誘契丹至今未已結連并寇與我
爲讎罪惡難名人神共憤今則推輪命將鳴鼓出師徵
浙右之樓船下朗陵之戈甲東西合勢水陸齊攻吳孫

皓之計窮自當歸命陳叔寶之數盡何處偷生應淮南將士軍人百姓等久隔朝廷莫聞聲教雖從僞俗應樂華風必須善擇安危早圖去就如能投戈獻款舉郡來降具牛酒以犒師納主符而請命車服玉帛豈忤旌酬土地山河誠無愛惜刑賞之令信若丹青苟或執迷寧免後悔王師所至軍政甚明不犯秋毫有如時雨百姓父老各務安居剽擄焚燒必令禁止云高麗國王王昭加開府儀同三司檢校太尉依前使持節玄菟州都督大義軍使王如故辛亥以前滄州節度使李暉爲邠州節度使壬子潞州奏破河東賊軍于祁縣癸丑西南面

行營都部署王景奏收復鳳州獲僞命節度使王環乙

卯曲赦秦鳳階成等州管內罪人自顯德二年十一月

已前凡有罪犯無問輕重一切釋放丁巳前邠州節度

使折從阮卒已未邠州奏河東劉崇死

案通鑑作顯德元年十一月北

漢主殂遣使告于契丹考異引王保衡見聞要錄劉繼
顯神道碑爲据疑薛史作二年爲誤今考遼史穆宗紀
應歷五年十一月漢主崇殂應歷五年卽周廣順二年
也與薛史合蓋薛史遼史皆以實錄爲据也五代春秋
亦作二年王戌淮南前軍都部署李穀奏先鋒都指揮使白

延遇破淮賊於來遠鎮十二月丙寅以左金吾大將軍

蓋萬爲右監門上將軍丁卯淄州奏前中書侍郎同平

章事景範卒庚午右金吾衛上將軍王守恩卒辛未安

州奏盜殺防禦使張頴是日翰林學士承旨徐台符卒
甲戌李穀奏破淮賊二千人于壽州城下丙子以左諫
議大夫權知開封府事王朴爲左散騎常侍充端明殿
學士依前權知開封府事永興軍奏節度使劉訥卒己
卯李穀奏破淮賊千餘人于山口鎮丙戌樞密使鄭仁
誨卒辛卯西南面行營都部署王景差人部送所獲僞
鳳翔節度使王環至闕詔釋之仍賜鞍馬衣服尋授右
驍衛案原本闕一字將軍是冬命起居郎陶文舉徵殘租于宋
州舉本酷吏也宋民被其刑者凡數千冤號之聲聞于
道路有悼耄之輩不勝其刑而死者數人物議以爲不

允永樂大典卷八
千九百八十四

舊五代史卷一百十五終

舊五代史卷一百十五攷證

周世宗紀二癸丑西南面行營都部署王景奏收復鳳
州案癸丑歐陽史作戊申

舊五代史卷一百十五攷證

舊五代史卷一百十六

宋司空同中書門下平章事薛居正等撰

世宗紀卷三

周書七

顯德三年春正月乙未朔帝不受朝賀前司空蘇禹圭
卒丁酉李穀奏破淮賊於上窑戊戌發丁夫十萬城京
師羅城庚子詔取此月八日幸淮南殿中監馬從贇免
所居官坐乾沒外孫女霍氏之貲產爲人所訟故也辛
丑以宣徽南院使向訓爲權東京留守以端明殿學士
王朴爲副留守壬寅車駕發京師丁未李穀奏自壽州
引軍退守正陽辛亥李重進奏大破淮賊於正陽斬首

二萬餘級伏尸三十里臨陣斬賊大將劉彥貞生擒偏將咸師朗已下獲戎甲三十萬事馬五百匹先是李穀駐軍于壽春城下以攻其城旣而淮南援軍大至乃與將佐謀曰賊軍舟楫將及正陽我師無水戰之備萬一橋梁不守則大軍隔絕矣不如全師退守正陽浮橋以俟鑿輅諸將皆以爲然遂燔其糧草而退軍迴之際無復嚴整公私之間頗多亡失淮北役夫亦有陷于賊境者帝聞之急詔侍衛都指揮使李重進率師赴之時淮賊乘李穀退軍之勢發戰棹數百艘沿淮而上且張斷橋之勢彥貞以大軍列陣而進李重進旣至正陽聞淮

軍在近率諸將渡橋而進與賊軍遇重進等合勢擊之

一鼓而敗之

馬令南唐書世宗親征行至圍鎮聞穀軍却意唐兵必追之遣李重進急趨正陽曰

唐兵且至宜急擊之彥貞等聞穀退軍皆以爲怯裨將咸師朗曰追之可大獲劉仁贍使人喻之曰君來赴援未交戰而敵人退不可測也慎勿追逐君爲大將安危以之脫有不利大事去矣前軍張全約亦曰不可追彥貞曰軍容在我汝輩何知沮吾事者斬比至正陽而重進先至未及食而戰彥貞施利刃于拒馬又刻木爲獸號捷馬牌以皮囊布鐵蒺藜于地周兵見而知其怯一鼓敗之彥貞死于陣

殺獲之外降者

三千餘人皆爲我將趙晁所殺甲寅車駕至正陽以待

衛都指揮使李重進爲淮南道行營都招討使命宰臣

李穀判壽州行府事乙卯車駕渡淮丙辰至壽州城下

營于州西北淝水之陽詔移正陽浮橋于下蔡庚申耀

兵于城下

春明退朝錄云家有范魯公雜錄記世宗親征忠正駐蹕城下中夜有白虹自灑水起亘

數丈下貫城

中數刻方沒王戊今上奏破淮賊萬餘眾于渦口斬僞

兵馬都監何延錫等獲戰船五十艘二月丙寅幸下蔡
斬前濟州馬軍都指揮使康儼于路左坐橋道不謹也
朗州節度使王進達奏領兵入淮南界戊辰廬壽巡檢
使司超奏破淮賊三千于盛唐獲都監僞吉州刺史高
弼以獻詔釋之兵部尙書張昭奏準詔撰集兵法分爲
十卷凡四十二門目之爲制旨兵法上之優詔褒美仍
以器幣賜之王申今上奏破淮賊萬五千人于清流山
乘勝攻下滁州擒僞命江州節度使充行營應援使皇

甫暉常州團練使充應援都監姚鳳以獻

王銍默記李景聞世宗親

至淮上而滁州其控扼且援壽州命大將皇甫暉監軍姚鳳提兵十萬扼其地太祖以周師數干與暉遇于清流關隘路周師大敗暉整全師入憇滁州城下會翊日再出太祖兵聚關下且虞暉兵再至問諸村人云有鎮州趙學究在村中教學多智計村民有爭訟者多請以決曲直太祖往訪之學究曰我有奇計所謂因敗爲勝轉禍爲福今關下有徑路無人行者雖牌軍亦不知之乃山之背也可以直抵城下方值西澗水大漲之時彼必謂我旣敗之後無敢躡其後者誠能由山背小路率兵浮西澗水至城下斬關而入可以得志太祖大喜且命學究以指其路學究亦不辭而遣人前導卽下令誓師夜從小路行三軍跨馬浮西澗以迫城暉果不爲備奪門以入暉始聞之率親兵擐甲與甲戌江南國主李太祖巷戰三縱而三擒之遂下滁州

景遣泗州牙將王知朗齎書一函至滁州本州以聞書

稱唐皇帝奉書于大周皇帝其畧云願陳兄事永奉鄰

歡設或俯鑒遠圖下交小國悉班卒乘俾父蒼黔慶雞
犬之相聞奉瓊瑤以爲好必當歲陳山澤之利少助軍
旅之須虔俟報章以聽高命道塗朝坦禮幣夕行云書
奏不答乙亥今上繫送所獲江南二將皇甫暉姚鳳至
行在詔釋之壬午江南國主李景遣其臣僞翰林學士
戶部侍郎鍾謨僞工部侍郎文理院學士李德明等奉
表來上敘願依大國稱臣納貢之意仍進金器千兩錦
綺綾羅二千匹及御衣犀帶茶茗藥物等又進犒軍牛
五百頭酒二千石是日賜謨等錦綺綾羅二百匹銀器
一百兩襲衣金帶鞍馬等丙戌侍衛馬軍指揮韓令坤

奏收下揚州

東都事略韓令坤傳率兵襲揚州將吏開門以迎之令坤整眾而入市不易肆人甚

悅

丁亥壽州城內左神衛軍使徐象等一十八人來奔

庚寅朗州節度使王進逵上言領兵入鄂州界攻長山

砦殺賊軍三千餘眾辛卯今上表僞命天長軍制置使

耿謙以本軍降獲糧草二千餘萬侍衛馬軍都指揮使

韓令坤上言泰州降癸巳荆南上言朗州節度使王進

逵爲部將潘叔嗣所殺

九國志王逵傳領眾逼宜春道出長沙耀兵金波亭有蜜蜂集

繳蓋中占者以爲不利遂留長沙令行營副使毛立領兵南下以潘叔嗣張文表爲前鋒叔嗣怒至豐陵擁眾而還逵聞兵叛乃乘輕舸奔歸遣人詣潭州請周行逢

武陵叔嗣追殺之于朗州城外

遣人詣潭州請周行逢

爲帥行逢至朗州斬叔嗣于市三月丙申行光州刺史

何超奏光州僞命都監張承翰以城歸順尋授承翰集

州刺史庚子文武百僚再上表請聽樂詔允之行舒州

刺史郭令圖奏收下舒州

隆平集王審琦傳世宗征淮舒州堅壁不下以郭令圖爲

刺史命審琦司超將兵攻城一夕拔之令圖入復見逐于郡人審琦方進軍援黃州聞令圖被逐乃選騎銜枚襲城夜敗其衆而復納之江南國主李景表送先隔過朝廷兵士一

百五十人至行在其軍卽蜀軍也秦鳳之役爲王師所

擒配隸諸軍及渡淮輒復南逸帝怒其奔竄盡戮之丙

午江南國主李景遣其臣僞司空孫晟僞禮部尙書王

崇質等奉表來上仍進金一千兩銀十萬兩羅綺二千

匹又進賞給將士茶絹金銀羅帛等庚戌兩浙奏遣大

將率兵攻常州延州留後李彥頽奏蕃眾與部民爲亂
尋與兵司都監閻綰掩殺獲其首帥高鬧兒等十人磔
于市彥頽本賈人也貪而好利蕃漢之民怨其侵刻故
至于是辛亥賜江南李景書曰頃自有唐失御天步方
艱巢蔡喪亂之餘朱李戰爭之後中夏多故六紀于茲
海縣瓜分英豪鼎峙自爲聲教各擅烝黎連衡而交結
四夷乘釁而憑陵上國華風不競否運所鍾凡百有心
孰不興憤朕猥承先訓恭荷永圖德不迨于前王道不
方于往古然而擅一百州之富庶握三十萬之甲兵且
農戰交修士卒樂用思欲報累朝之宿怨刷萬姓之包

羞是以踐位以來懷安不暇破幽并之巨寇收秦鳳之
全封兵不告疲民有餘力一昨迴軍隴上問罪江干我
實有辭咎將誰執朕親提金鼓尋渡淮淝上順天心下
符人欲前鋒所向彼眾無遺棄甲僵尸動盈川谷收城
徇地已過滁陽豈有落其爪牙折其羽翼潰其心腹扼
其吭喉而不亡者哉蚤者泗州主將遞送到書一函尋
又使人鍾謨李德明至齋所上表及貢奉衣服腰帶金
銀器幣茶藥牛酒等今又使人孫晟等並到行朝觀其
降身聽命引咎告窮所謂君子見機不俟終日苟非達
識孰能若斯但以奮武興戎所以討不服惇信明義所

以懷遠人五帝三王盛德大業恆用此道以正萬邦朕
今躬統戎師襲行討伐告于郊廟社稷詢于將相公卿
天誘其衷國無異論苟不能恢復內地申畫邊疆便議
班旋真同戲劇則何以光祖宗之烈厭士庶之心匪獨
違天兼且拂眾但以淮南部內已定六州廬壽濠黃大
軍悉集指期尅日拉朽焚枯其餘數城非足介意必若
盡淮甸之土地爲大國之提封猶是遠圖豈同迷復如
此則江南吏卒悉遣放還江北軍民並當留住免違物
類之性俾安鄉土之情至于削去尊稱願輸臣禮非無
故事實有前規蕭啓奉周不失附庸之道孫權事魏自

同藩國之儀古也雖然今則不取但存帝號何爽歲寒
儻堅事大之心終不迫人于險事資真懇辭匪枝游俟
諸郡之悉來卽大軍之立罷質于天地信若丹青我無
彼欺爾無我詐言盡于此更不繁云苟日未然請自茲
絕切以陽春在候庶務縈思願無廢于節宣更自期于
愛重音塵非遠風壤猶殊翹想所深勞于寤寐又賜其
將佐書曰朕自類禡出師麾旄問罪絕長淮而電擊指
建業以鷹揚旦夕之間克捷相繼至若兵興之所自釁
起之所來勝負之端倪戎甲之次第不勞盡論必想具
知近者金陵使人繼來行闕追悔前事委質來朝非無

謝咎之辭亦有罷軍之請但以南邦之土地本中夏之
封疆苟失克復之期大辜朝野之望已興是役固不徒
還必若自淮以南畫江爲界盡歸中國猶是遠圖所云
願爲外臣乞比湖浙彼旣服義朕豈忍人必當別議封
崇待以殊禮凡爾將佐各盡乃心善爲家國之謀勉擇
恒久之利初李景遣鍾謨李德明奉表至行闕使人面
奏云本國主願割壽濠泗楚光海六州之地歸于大朝
帝志在盡取江北諸郡不允其請使人見王師急攻壽
陽李德明奏曰願陛下寬臣數日之誅容臣自往江南
取本國表盡獻江北之地帝許之乃令李德明王崇質

齎此書以賜李景夏四月甲子以徐州節度使武行德爲濠州城下行營都部署以前鄧州節度使侯章爲壽州城下水砦都部署己巳車駕發壽春循淮而東辛未揚州奏江南大破兩浙軍于常州初兩浙錢俶承詔遣部將率兵攻常州爲江南大將陸孟俊所敗將佐陷沒者甚眾李景亦以表聞乙亥駐蹕于濠州城下丁丑揚州韓令坤破江南賊軍于州之東境獲大將陸孟俊今上表大破江南軍于六合斬首五千級時李景乘常州之捷遣陸孟俊領兵迫泰州王師不守韓令坤欲棄揚州而迴帝怒急遣殿前都指揮使張永德率親兵往援

之又命今上領步騎二千人屯于六合俄而陸孟俊領其徒自海陵抵揚州令坤迎擊敗之生擒孟俊李景遣其弟齊王達率大眾由瓜步濟江距六合一舍而設柵居數日乃棄柵來迫官軍今上麾兵以擊之賊軍大敗餘眾赴江溺死者不可勝紀已卯韓令坤奏敗楚州賊將馬在貴萬餘眾于灣頭堰獲漣州刺史秦進崇丙戌以宣徽南院使向訓爲權淮南節度使充沿江招討使以侍衛馬軍都指揮使韓令坤充沿江副招討使

宋史向拱

傳揚州初平南唐令境上出師謀收復韓令坤有棄城之意卽驛召拱赴行在拜淮南節度使依前宣徽使兼沿江招討使以令坤爲副時周師久駐淮陽都將趙晁白延遇等驕恣橫暴不相稟從惟務貪濫至有劫人婦

女者及拱至戮其不法者數輩軍中肅然

丁亥車駕發濠州幸渦口已丑以

前湖南節度使馬希崇爲左羽林統軍五月壬辰朔以

渦口爲鎮淮軍戊戌車駕還京發渦口

馬令南唐書天子駐于渦口猶

欲再幸揚州宰相范質

乙卯上至自淮南詔赦都下見

以師老泣諫乃班師禁罪人丁巳陳州節度使王令溫卒戊午以江南僞命

東都副留守工部侍郎馮延魯爲太府卿己未太子賓

客于德辰卒辛酉詔天下公私織造布帛及諸色匹段

幅尺斤兩並須依向來制度不得輕弱假僞犯者擒捉

送官六月甲子以鳳翔節度使王景爲秦州節度使兼

西面沿邊都部署以宣徽南院使陳州節度使向訓爲

淮南節度使依前南院宣徽使加檢校太尉以曹州節度使韓通爲許州節度使加檢校太尉以亳州防禦使王全斌爲隴州防禦使遙領利州昭武軍兩使留後丙寅許州王彥超移鎮永興軍鄧州田景咸移鎮鄆州御史中丞楊昭儉知雜侍御史趙礪侍御史張紉並停任坐鞠獄失實也丁卯以翰林學士戶部侍郎陶穀爲兵部侍郎充翰林學士承旨以水部員外郎知制誥扈載度支員外郎王著並本官充翰林學士以給事中高防爲右散騎常侍以前都官郎中知制誥薛居正爲左諫議大夫充昭文館學士判館事壬申曲赦淮南道諸州

見禁罪人自今年六月十一日已前凡有違犯無問輕重並不窮問先屬江南之時應有非理科徭無名配率一切停罷云戊寅以右衛上將軍扈彥珂爲太子太師致仕庚辰以西京留守王晏爲鳳翔節度使戊子升贍國軍爲濱州淮南道招討使李重進奏壽州賊軍攻南砦王師不利先是詔步軍都指揮使李繼勳營于壽州之南攻賊壘是日賊軍出城來攻我軍破柵而入其攻城之具並爲賊所焚將士死者數百人李重進在東砦亦不能救時城堅未下師老于外加之暑毒糧運不繼李繼勳喪失之後軍無固志諸將議欲退軍賴今上自

六合領兵歸闕過其城下因爲駐留旬日王師復振秋
七月辛卯朔以武清軍節度使知潭州軍府事周行逢
爲朗州大都督充武平軍節度使加檢校太尉兼侍中
丁酉以太子賓客盧價爲禮部尙書致仕以給事中李
明爲大理卿庚子廬州行營都部署劉重進奏破淮賊
千餘人於州界丁未濠州行營都部署武行德奏敗淮
賊二千人於州界庚戌太子太保王仁裕卒辛亥皇后
符氏薨淮南節度使向訓自揚州班師廻駐壽春時王
師攻壽春經年未下江淮盜賊充斥舒蘄和泰等州復
爲吳人所據故棄揚州併力於壽春焉

馬令南唐書向
訓請棄揚州併

力以攻壽春乃封府庫付主者遣淮南舊將按巡城
中秋毫不犯而去淮人大悅皆負糗糧以送周師

八

月壬戌河陽白重贊移鎮涇州張鐸移鎮河中甲子以
前鄧州節度使侯章復爲鄧州節度使以侍衛步軍都
指揮使彰信軍節度使李繼勳爲河陽節度使乙丑太
僕卿劇可久停任坐爲舉官累也戊辰端明殿學士王
朴撰成新歷上之命曰顯德欽天歷上親爲製序仍付
司天監行用殿前都指揮使張永德奏破淮賊于下蔡
先是江南李景以王師猶在壽州遣其將林仁肇郭廷
謂率水陸軍至下蔡欲奪浮梁以舟是薪芻乘風縱火
永德禦之有頃風勢倒指賊眾稍却因爲官軍所敗已

卯工部侍郎王敏停任坐薦子壻陳南金爲河陽記室也九月丙午以端明殿學士左散騎常侍權知開封府事王朴爲尙書戶部侍郎充樞密副使以右羽林統軍焦繼勳爲左屯衛上將軍以左衛上將軍楊承信爲右羽林統軍以左監門上將軍宋延渥爲右神武統軍冬十月辛酉葬宣懿皇后于懿陵癸亥以右神武統軍宋延渥爲廬州行營副部署乙丑舒州刺史郭令圖責授虢州教練使坐棄郡逃歸也丙寅詔曰諸司職員皆係奏補當執役之際悉藉公勤及聽選之時尤資幹敏苟非慎擇漸致因循應諸司寺監今後收補役人並須人

材俊利身言可採書札堪中自前行止委無訛濫勒本
司關送吏部引驗人材考校筆札其中選者連所試書
跡及正身引過中書餘從前後格勅處分仍每年祇得
一度奏補丁卯宣懿皇后神主入廟時有司請爲后立
別廟禮也已巳詔漳河已北郡縣並許鹽貨通商逐處
有鹹鹵之地一任人戶煎鍊壬申以武平軍節度副使
知潭州軍府事宇文瓊爲武清軍節度使知潭州軍府
事癸酉淮南招討使李重進奏破淮賊於盛唐斬二千
級太子賓客致仕薛仁謙卒丙子襄州節度使守太尉
兼中書令陳王安審琦加守太師審琦鎮漢上十餘年

至是來朝故以命寵之癸未右拾遺趙守微杖一百配沙門島守微本村民也形貌樸野粗學爲文前年徒步上書帝以急于取士授右拾遺聞者駭其事至是爲妻

父所訟彰其醜行故逐之

東都事略張昭傳云世宗好拔奇取俊有自布衣上書下

位言事者多不次進用昭諫曰昔唐初劉洎馬周起徒步太宗擢用爲相其後朱朴柳璨在下僚昭宗亦以大用然則太宗用之于前而國興昭宗用于後而國亡士之難知也如此臣願陛下存舊法而用人以劉馬爲鑒朱柳爲戒

則善矣

甲申宣授今上同州節度使兼殿前都指揮

使宣授內外馬步軍都軍頭袁彥爲曹州節度使兼侍衛步軍都指揮使戊子右神武統軍張彥超卒十一月己丑朔詔廢天下無名祠廟庚子日南至帝不受朝賀

以宣懿皇后遷祔日近也乙巳江南進奉使孫晟下獄死江南進奉使鍾謨責授耀州司馬戊申放華山隱者陳搏歸山帝素聞搏有道術徵之赴闕月餘放還舊隱庚戌殿前都指揮使張永德奏敗濠州送糧軍二千人於下蔡奪米船十餘艘宰臣李穀以風痺請告十旬三上表求解所任不允十二月己未朔以給事中張鑄爲光祿卿詠以官名與祖諱同尋改秘書監判光祿寺事辛酉以許州節度使韓通兼侍衛馬步軍都虞候壬戌以右領軍大將軍權判三司張美領三司使壬申以滑州節度使兼殿前都指揮使駙馬都尉張永德爲殿前

都點檢發陳蔡宋亳潁曹單等州丁夫城下蔡辛己故襄邑令劉居方贈右補闕男士衡賜學究出身獎廉吏也癸亥詔兵部尙書張昭纂修太祖實錄及梁均王唐

清泰帝兩朝實錄

五代會要云同修撰官委張昭定名奏請至四年正月張昭奏請國子祭

酒尹拙太子詹事劉溫叟同編修

又詔曰史館所少書籍宜令本館諸

處求訪補填如有收得書籍之家並許進書人據部帙多少等第各與恩澤如是卷帙少者量給資帛如館內已有之書不在進納之限仍委中書門下于朝官內選差三十人據見在書籍各求真本校勘署校官姓名逐月具功課申報中書門下戊子淮南道招討使李重進

奏破淮賊二千人場山北

永樂大典卷八千九百八十四

舊五代史卷一百十六終

舊五代史卷一百十六攷證

周世宗紀三王申今上奏破淮賊萬五千人于清流山
案歐陽修豐樂亭記太祖以周師破李景兵十五
萬于清流關下與是書作萬五千人異攷國老談苑
云太祖提周師甚寡當李景兵十五萬于清流山下
臨陣親斬驍將皇甫暉疑豐樂亭記卽本于此第皇
甫暉以傷重被擒而談苑云臨陣親斬小說家多傳
會之詞恐不足信

舊五代史卷一百十六攷證

舊五代史卷一百十七

宋司空同中書門下平章事薛居正等撰

世宗紀第四

周書

顯德四年春正月己丑朔帝御崇元殿受朝賀仗衛如儀詔天下見禁罪人除大辟外一切釋放壬寅兵部尙書張昭上言奉詔編修太祖實錄及梁唐二末主實錄伏以撰漢書者先爲項籍編蜀記者首序劉璋貴神器之傳授有因歷數之推遷得序伏緣漢隱帝君臨在太祖之前歷試之績並在隱帝朝內請先修隱帝實錄以全太祖之事功又以唐末主前有閔帝在位四月出奔

舊唐書卷一百一十一

於衛亦未編紀請修閔帝實錄其清泰帝寔錄請書爲

廢帝實錄從之案自唐末主以上原文疑有脫誤據五代會要云梁末主之上有郢王友珪篡

弑居位未有紀錄請依宋書劉劭例書爲元凶友珪其

末主請依古義書曰後梁實錄又唐末主之前有應順

帝在位四月出奔亦未編紀請書爲前廢帝清泰主爲後廢帝其書並爲實錄丁未淮南道招

討使李重進奏破淮賊五千人於壽州北先是李景遣

其弟僞齊王達率全軍來援壽州達留駐濠州遣其將

許文縝邊鎬朱元領兵數萬泝淮而上至紫金山設十

餘砦與城內烽火相應又築夾道數里將抵壽春爲運

糧之路至是爲重進所敗戊申詔取來月幸淮南宋史李穀

傳師老無功時請罷兵爲便世宗令范質王溥就穀謀

之穀手疏請親征有必勝之利者三世宗大悅用其策

二月庚申以前工部侍郎王敏爲司農卿辛酉詔每遇入閣日賜百官廊下食從舊制也淮南道行營都監向訓奏破淮賊二千于黃蓍砦甲戌以樞密副使王朴爲權東京留守兼判開封府以三司使張美爲大內都巡檢乙亥車駕發京師乙酉次下蔡三月庚寅旦帝率諸軍駐于紫金山下令今上率親軍登山擊賊連破數砦斬獲數千斷其來路賊軍首尾不相救是夜賊將朱元朱仁裕孫璘各舉砦來降降其眾萬餘人翌日盡陷諸砦收獲甚眾擒賊大將建州節度使許文縝前湖南節度使邊鎬其餘黨沿流東奔帝自率親騎沿淮北岸追

賊及晡馳二百餘里至鎮淮軍殺獲數千人奪戰艦糧船數百艘錢帛器仗不可勝數甲午詔發近縣丁夫城鎮淮軍仍構浮梁于淮上廬州都部署劉重進奏殺賊三千人於壽州東山口皆紫金山之潰兵也戊戌授宣徽南院使淮南節度使向訓爲徐州節度使充淮南道行營都監卽命屯鎮淮上己亥帝自鎮淮軍復幸下蔡壬寅賜淮南降軍許文縝邊鎬已下萬五百人衣服錢帛有差丙午壽州劉仁贍上表乞降帝遣閤門使張保續入城慰撫翌日仁贍復令子崇讓上表請罪戊申幸壽州城北劉仁贍與將佐已下及兵士萬餘人出降

案通

鑑考異云仁贍降書蓋其副使孫羽等爲之歐陽史本傳亦言孫羽詐爲仁贍書以城降與是書所載俱異

帝慰勞久之恩賜有差庚戌詔移壽州于下蔡以故壽州爲壽春縣是日曲赦壽州管內見禁人犯自今月二十一日已前凡有過犯並從釋放應歸順職員並與加恩壽州管界去城五十里內放今年秋夏租稅自來百姓有曾受江南文字聚集山林者並不問罪如有曾相傷害者今後不得更有相讐及經官論訴自用兵已來被擄却骨肉者不計遠近並許本家識認官中給物收贖曾經陣敵處所暴露骸骨並仰收拾理瘞自前政令有不便于民者委本州條例聞奏當行釐革辛亥以僞

命清淮軍節度使檢校太尉兼侍中劉仁贍爲特進檢校兼中書令鄆州節度使以右羽林統軍楊信爲壽州節度使是日劉仁贍卒王子以江南僞命西北面行營都監使舒州團練使朱元爲蔡州防禦使以江南僞命文德殿使壽州監軍使周延構爲衛尉卿以江南僞命壽州營田副使孫羽爲太僕卿以壽州節度判官鄭牧爲鴻臚卿賞歸順也癸丑追奪前許州行軍司馬韓倫在身官爵配流沙門島倫侍衛馬軍都指揮使令坤之父也令坤領陳州倫在州干預郡政掊歛之暴公私患之爲項城民武都等所訟帝命殿中侍御史率汀就按

之倫詐報汀云準詔赴闕汀卽奏之帝愈怒遽令追劾

盡得其實故有是命

宋史韓令坤傳云倫法當棄市令坤泣請于世宗遂免死

遣左

諫議大夫尹日就于壽州開倉賑飢民丙辰車駕發下

蔡還京夏四月己巳車駕至自下蔡辛未以江南僞命

西北面行營應援使前永安軍節度使檢校太尉許文

縝爲左監門衛上將軍檢校太尉以僞命西北面行營

應援都軍使前武安軍節度使邊鎬爲左千牛衛上將

軍檢校太尉丙子宰臣李穀以風痺經年上章請退凡

三上章不允

宋史李穀傳穀扶疾入見便殿詔令不拜命坐御坐側以抱疾久請辭相位世宗怡

然勉之謂曰譬如家有四子一人有疾棄而不養非父之道也朕君臨萬方卿處輔相之位君臣之間分義斯

在奈何以祿奉爲言穀愧謝而退

丁丑斬內供奉官孫延希于都市御

厨使董延勛副使張皓武德副使盧繼昇並停職時重修永福殿命延希督役上見役夫有就瓦中噉飯以柿爲七者大怒斬延希而罷延勛等壬午故彭城郡夫人劉氏追冊爲皇后癸未故皇子贈左驍衛大將軍誼再贈太尉追封越王故皇子贈左武衛大將軍誠再贈太傅追封吳王故皇子贈左屯衛大將軍誠再贈太傅追封韓王故皇弟贈太保侗再贈太傅追封鄴王故皇弟贈司空信再贈司徒追封杞王第三妹樂安公主追封莒國長公主故皇第五妹永寧公主追冊梁國長公主

故皇從弟贈左領軍大將軍守愿再贈左衛大將軍故
皇從弟贈左監門將軍奉詔再贈右衛大將軍故皇從
弟贈左千牛衛將軍慈再贈右武衛大將軍甲申以先
降到江南兵士團結爲三十指揮號懷德軍五月丁亥
朔帝御崇元殿受朝仗衛如式己丑以新修永福殿改
爲廣政殿辛卯以端午賜文武百寮衣服書始也癸巳
侍衛親軍都指揮使宋州節度使充淮南道行營都招
討李重進加檢校太傅兼侍中以宣徽南院使淮南節
度使向訓爲徐州節度使加檢校太尉同平章事丙申
斬密州防禦副使侯希進于本郡時太常博士張紉檢

視本州夏苗移牒希進分檢希進以不奉朝旨不從糺具事以聞帝怒遣使斬之丁酉以滑州節度使兼殿前都點檢駙馬都尉張永德爲澶州節度使加檢校太尉以今上爲滑州節度使加檢校太保依前殿前都指揮使今上以三年十月宣授同州節度使未於正衙宣制至是移鎮滑臺故自永州防禦使授焉以侍衛馬軍都指揮使洋州節度使韓令坤爲陳州節度使加檢校太傅以權侍衛步軍都指揮使岳州防禦使袁彥爲曹州節度使加檢校太保並典軍如故己亥以左神武統軍劉重進爲鄧州節度使以虎捷左廂都指揮使閬州防

禦使趙晁爲河陽節度使以兗州防禦白延遇爲同州
節度使辛丑宰臣范質李穀王溥並加爵邑改功臣樞
密使魏仁浦加檢校太傅進封開國公辛亥知廬州行
府事劉重進奏相次殺敗賊獲戰船三十艘壬子以宣
徽北院使吳延祚爲宣徽南院使權西京留守判河南
府事是月詔中書門下差官詳定格律中書門下奏差
侍御史知雜事張湜等十人詳定候畢日委御史臺尙
書省四品已上兩省五品已上官參詳可否送中書門
下議定奏取進止從之六月丁巳前濠州刺史齊藏珍
以罪棄市己未以責授耀州司馬鍾謨爲衛尉少卿賜

紫帝旣誅孫晟尋竄謨爲耀州旣而悔之故有是命辛酉西京奏伊陽山谷中有金屑民淘取之詔勿禁乙酉詔在朝文武官再舉堪爲令錄從事者各一人秋七月丁亥以前徐州節度使檢校太師兼中書令武行德爲左衛上將軍先是詔行德分兵屯定遠縣旣爲淮寇所襲王師死者數百人帝懲其僨軍之咎故以環衛處之以前河陽節度使李繼勳爲右衛大將軍責壽春南砦之敗也壬辰以刑部尙書王易爲太子少保致仕以右監門衛上將軍蓋萬爲左衛上將軍致仕己酉司農卿王敏卒甲辰詔曰準令諸論田宅婚姻起十一月一日

至三月三十日止者州縣爭論舊有釐革每至農月貴
塞訟端近聞官吏因循由此成弊凡有訴競故作逗遛
至時而不與盡辭入務而即便停罷強猾者因茲得計
孤弱者無以自申起今後應有人論訴陳辭狀至二月
三十日權停若是交相侵奪情理妨害不可停滯者不
拘此限八月乙卯朔兵部尙書張昭上疏望準唐朝故
事置制舉以罩英才帝覽而善之因命昭具制舉合行
事件條奏以聞丙辰以太常卿田敏爲工部尙書以太
子賓客司徒詔爲太常卿辛未詔在朝武班各舉武勇
膽力堪爲軍職者一人甲戌賜左監門上將軍許文纘

右千牛上將軍邊鎬右衛大將軍王環衛尉卿周延構
太府卿馮延魯太僕卿鄭牧鴻臚卿孫羽衛尉少卿鍾
謨工部郎中何幼沖各冬服絹二百匹綿五百兩文纁
已下皆吳蜀之士也乙亥宰臣李穀罷相守司空加食
邑實封穀抱疾周歲累上表求退至是方允其請以樞
密副使戶部侍郎王朴爲樞密使檢校太保癸未前濮
州刺史胡立自僞蜀廻蜀主孟昶寓書于帝其末云昶
昔在齟齬卽離并都亦承皇帝鳳起晉陽龍興汾水合
敘鄉關之分以陳玉帛之歡倘蒙惠以嘉音伫望專馳
信使謹因胡立行次聊陳感謝披述云初王師之伐秦

鳳也以立爲排陣使旣而爲蜀所擒及秦鳳平得降軍數千人其後帝念其懷土悉放歸蜀至是蜀人知感故歸立于我昶本生于太原故其書意願與帝推鄉里之分帝怒其抗禮不答九月甲申朔宰臣王溥樞密使王朴皆丁內艱並起復舊位以侍衛馬步軍都指揮宋州節度使李重進爲鄆州節度使典軍如故己丑以前翰林學士禮部侍郎竇儀爲端明殿學士依前禮部侍郎冬十月丙辰賜京城內新修四寺額以天清天壽顯靜顯寧爲名壬戌左藏庫使符令光棄市時帝再議南征先期勅令光廣造軍士袍襦不卽辦集帝怒命斬之時

宰臣等至庭救解帝起入宮遂戮于都市令光出勳閤
之後歷職內庭以清慎自守累擢繁劇甚有廉幹之譽
帝素重其爲人每加委用至是以小過見誅人皆冤之
戊午詔懸制科凡三其一曰賢良方正能直言極諫科
其二曰經學優深可爲師法科其三曰詳閑吏理達于
教化科不限前資見任職官黃衣草澤並許應詔時兵
部尙書張昭條奏請興制舉故有是命癸亥河東僞命
麟州刺史楊重訓以城歸順授重訓本州防禦使檢校
太傅戊辰詔取月內車駕暫幸淮上己巳以樞密使王
朴爲權東京留守以三司使張美爲大內都點檢壬辰

駕發京師壬午以前鄆州節度使郭從義爲徐州節度使以徐州節度使向訓爲宋州節度使十一月癸未朔以內客省使咎居潤爲宣徽北院使權東京留守丙戌車駕至濠州城下戊子親破十八里灘砦在濠州東北淮水之中四面阻水上令甲士數百人跨馳以濟今上以騎軍浮水而渡遂破其砦擄其戰艦而迴癸巳帝親率諸軍攻濠州奪關城破水砦賊衆大敗焚戰艦七千餘艘斬首二千級進軍攻羊馬城丙申夜僞濠州團練使郭廷謂上表陳情且言家在江南欲遣人稟命于李景從之辛丑帝自濠州率大軍水陸齊進循淮而下命

今上率精騎爲前鋒癸卯大破淮賊于渦口斬首五千級收降卒二千餘人奪賊船三百艘遂鼓行而東以追奔寇晝夜不息沿淮城柵所至皆下乙巳至泗州今上乘勢麾軍焚郭門奪月城帝親冒矢石以攻其壘丙午日南至從臣拜賀于月城之上十二月乙卯泗州守將范再遇以其城降授再遇宿州團練戊午帝自泗州率眾東下命今上領兵行于南岸與帝夾淮而進己未至清口追及淮賊軍行鼓譟之聲聞數十里辛酉至楚州西北大破賊眾水陸俱奔有賊船數艘順流而逸帝率驍騎與今上追之數十里今上擒賊大將僞保義軍節

度使江北都應援使陳承昭以獻收獲舟船除焚盪外
得三百餘艘將士除殺溺外得七千餘人初帝之渡淮
也比無水戰之備每遇賊之戰棹無如之何敵人亦以
此自恃有輕我之意帝卽于京師大集工徒修成樓艦
踰歲得數百艘兼得江淮舟船遂令所獲南軍教北人
習水戰出沒之勢未幾舟師大備至是水陸皆捷故江
南大震壬戌僞命濠州團練使郭廷謂以城歸順乙丑
雄武軍使崔萬廸以漣水歸順丙寅以郭廷謂爲亳州
防禦使

隆平集廷謂望金陵大慟再拜然後以城降世宗曰江南諸將惟卿斷渦口橋破定遠寨足以

報李景祿矣濠上使李景自守以僞命濠州兵馬都監
亦何能爲乃授以亳州防禦使

舊五代史卷一百十七
陳遷爲沂州團練使以僞命保義軍節度使陳承昭爲
右監門上將軍江南李景遣兵驅擄揚州士庶渡江焚
其州郭而去丙子故同州節度使白延遇贈太尉故濠
州刺史唐景思贈武清軍節度使丁丑泰州平
永樂大典卷八
千九百
八十四

舊五代史卷一百十七終

舊五代史卷一百十七攷證

周世宗紀四 是夜賊將朱元朱仁裕孫璘各舉砦來降
案通鑑云辛卯夜朱元與先鋒壕寨使朱仁裕等
舉寨萬餘人降據是書則朱元等之降卽在庚寅與
通鑑異

壬午彭城郡夫人劉氏追冊爲皇后 案歐陽史作癸
未追冊與是書異

壬申駕發京師 案壬申原本作壬辰攷五代春秋作
十月壬辰帝南征與是書同歐陽史作壬申南征通
鑑作壬申帝發大梁與是書異據下文有壬午則十

月不應有壬辰疑原本係傳寫之誤今從歐陽史通
鑑改正

以內客省使胥居潤爲宣徽北院使權東京留守 案
上文以王朴爲權東京留守不應復以命胥居潤據
東都事略胥居潤傳世宗幸淮上命爲副留守疑原
本脫副字

壬戌僞命濠州團練使郭廷謂以城歸順 案郭廷謂
以城降歐陽史作庚申通鑑作辛酉與是書異

舊五代史卷一百十七攷證

舊五代史卷一百十八

宋司空同中書門下平章事薛居正等撰

世宗紀第五

顯德五年春正月癸未朔帝在楚州城下從臣詣行宮

稱賀

隆平集馬仁瑀傳世宗征淮南登楚州水寨飛樓距城百步城卒詬罵左右射莫能及召仁瑀至應

弦而斃

乙酉降同州爲郡右驍衛將軍王環卒丙戌右龍

武將軍王漢璋奏攻海州戊子詔諸道幕職州縣官並

以三周年爲考限閏月不在其內州府不得差攝官替

正官云巳丑詔侍衛馬軍都指揮使韓令坤權知揚州

軍府事庚寅發楚州管內丁壯開鵲河以通運路乙己

周書九

書

帝親攻楚州時今上在楚州城北晝夜不解甲胄親冒

矢石麾兵以登城丙午拔之斬僞守將張彥卿等六軍

大掠城內軍民死者萬餘人廬舍焚之殆盡

陸游南唐書張彥卿

傳云保大末周世宗南侵彥卿爲楚州防禦使周師銳甚旬日間海泰州靜海軍皆破元宗亦命焚東都宮寺民廬徙其民渡江世宗親御旗鼓攻楚州自城以外皆已下發州民濬老鵲河遣齊雲戰艦數百自淮入江勢如雷霆烈炤彥卿獨不爲動及梯衝臨城鑿城爲窟室實城而焚之城皆摧圯遂陷彥卿猶結陣城內誓死奮擊謂之巷鬪日暮轉至州解長短兵皆盡彥卿猶取繩牀搏戰及兵馬都監鄭昭業等千餘人皆死之無一人生降者周兵死傷亦甚眾世宗怒盡屠城中居民焚其室廬然得彥卿子光祐不殺也又趙鼎臣竹隱諫以周二當城中之危也彥卿方與諸將立城上因泣諫以周唐強弱勢不足以相支又城危甚而外無一人援恐旦夕徒死無益勸彥卿趣降彥卿領之因顧諸將指曰視彼諸將方回顧彥卿則抽劍斷其子首擲諸地慷慨泣

謂諸將曰此彥卿子勸彥卿降周彥卿受李家厚恩誼不降此城吾死所也諸軍欲降任降第勿勸我勸我者同此子矣于是諸將

愕眙亦泣莫敢言降

二月甲寅僞命天長軍使易贇以

城歸順戊午車駕發楚州南巡丁卯駐蹕于廣陵詔發

揚州部內丁夫萬餘人城揚州帝以揚州焚盪之後居

民南渡遂于故城內就東南別築新壘戊辰遣使祭故

淮南節度使楊行密故昇府節度使徐溫等墓癸酉幸

揚子渡觀大江乙亥黃州刺史司超奏破淮賊三千人

擒僞舒州刺史施仁望丙子隰州奏河東賊軍逃遁時

劉鈞聞帝南征發兵圍隰州巡檢使李謙溥以州兵拒

之而退

東都事略楊廷璋傳隰州闕守乃請監軍李謙溥攝州事謙溥至隰井人來圍其城或請速救

之廷璋曰賊遽至必未攻城乃募死士百餘人潛諭謙
傳相應夜銜枚擊之井人大潰逐北數十里又李謙溥
傳云隰州闕守謙溥攝州事至則濬城隍嚴兵備未旬
日而井人至方盛暑謙溥服絺綌揮羽扇引二小吏登
城徐步井人望之勒兵不敢動三月壬午朔幸泰州丁亥復幸廣陵辛

卯幸迎鑾江口遣右武衛大將軍李繼勳率舟師至江
島以觀寇癸巳帝臨江望見賊船數十艘命今上帥戰
棹以追之賊軍退去今上直抵南岸焚其營柵而迴甲
午以右武衛大將軍李繼勳爲左領軍上將軍乙未殿
前都虞候慕容延釗奏大破賊軍于東沛州丙申江南
李景遣其臣兵部侍郎陳覺奉表陳情兼貢羅縠細絹
三千匹乳茶三千斤及香藥犀象等覺至行在觀樓船

戰棹已泊于江岸以爲自天而降愕然大駭丁酉荆南
高保融奏本道舟師已至鄂州戊戌兩浙錢俶奏差發
戰棹四百艘水軍一萬七千人已泊江岸請師期己亥
今上率水軍破賊船百餘隻于瓜步是日李景遣其臣
劉承遇奉表以廬舒蘄黃等四州來獻且請以江爲界
帝報曰皇帝恭問江南國主使人至省奉請分割舒廬
蘄黃等州畫江爲界者頃逢多事莫通玉帛之歡適自
近年遂構干戈之役兩地之交兵未息蒸民之受弊斯
多一昨再辱使人重尋前意將敦久要須盡縷陳今者
承遇爰來封函復至請割州郡仍定封疆猥形信誓之

辭備認始終之意既能如是又復何求邊陲頓靜于烟
塵師旅便還于京闕永言欣慰深切誠懷其常潤一路
及沿江兵棹今已指揮抽退兼兩浙荆南湖南水陸兵
士各令罷兵其廬黃蘄三路將士亦遣抽拔近內候彼
中起揭逐處將員及軍都家口丁畢祇請差人勾喚在
彼將校交割州城云淮南平凡得州十四縣六十戶三
十二萬六千五百七十四先是李景以江南危蹙謀欲
傳位于世子使附庸于我故遣陳覺上表陳敘至是帝
以旣許其通好乃降書以答之曰別覩來章備形縉旨
敘此日傳讓之意述向來高尙之懷仍以數歲已還交

兵不息備論追悔之事無非尅責之辭雖古人有引咎
責躬因災致懼亦無以過此也況君血氣方剛春秋
甚富爲一方之英主得百姓之歡心卽今南北才通疆
場甫定是玉帛交馳之始乃干戈載戢之初豈可高謝
君臨輕辭世務與其慕希夷之道曷若行康濟之心重
念天災流行分野常事前代賢哲所不能逃苟盛德之
日新則景福之彌遠勉修政理勿倦經綸保高義于初
終垂遠圖于家國流芳貽慶不亦美乎庚子詔曰比者
以近年貢舉頗事因循頻詔有司精加試練所冀去留
無濫優劣昭然昨據貢院奏今年新及第進士等所試

文字或有臧否爰命辭臣再令考覆庶涇渭之不雜免
玉石之相參其劉坦戰貽慶李頌徐緯張觀等詩賦稍
優宜放及第王汾據其文辭亦未精當念以頃曾剝落
將與成名熊若谷陳保衡皆是遠人深可嗟念亦放及
第郭峻趙保雍楊丹安玄度張昉董咸則杜思道等未
甚苦辛並從退黜更宜修進以俟將來知貢舉右諫議
大夫劉濤選士不當有失用心責授右贊善大夫俾令
省過以戒當官先是濤于東京放榜後引新及第進士
劉坦已下十五人赴行在帝命翰林學士李昉覆試故
有是命壬寅復幸揚州改廬州軍額爲保信軍甲辰以

右龍武統軍趙贊爲廬州節度使以殿前都虞候慕容延釗爲淮南節度使兼殿前副指揮使遣鹽城監使申屠諤齎書及御馬一十匹金銀銜全散馬四十四匹羊千口賜江南李景諤先爲王師所俘故遣之丙午江南李景遣所署宰相馮延巳獻犒軍銀十萬兩絹十萬匹錢十萬貫茶五十萬觔米麥二十萬石庚戌詔故淮南節度使楊行密故昇府節度使徐溫各給守冢戶應江南臣寮有先代墳墓在江北者委所在長吏差人檢校辛亥李景遣所署臨汝郡公徐遼進買宴錢二百萬并遣伶官五十人與遼俱來獻壽觴夏四月癸丑宴從臣及

江南進奉使馮延巳等于行宮徐遼代李景捧壽觴以獻進金酒器御衣犀帶金銀錦綺鞍馬等乙卯車駕發揚州還京丙辰太常博士權知宿州軍州使趙礪除名坐推劾弛慢也先是翰林醫官馬道玄進狀訴壽州界被賊殺却男獲正賊見在宿州本州不爲勘斷帝大怒遣端明殿學士竇儀乘駟往按之及獄成坐族死者二十四人儀奉辭之日帝旨甚峻故儀之用刑傷于深刻戊午以前延州留後李延頽爲滄州留後庚申新太廟成遷五廟神主入于其室壬申至自淮南癸酉命宣徽北院使咎居潤判開封府事甲戌澶州節度使張永德

準詔赴北邊以契丹犯境故也丁丑兩浙奏四月十九日杭州火廬舍府署延燒殆盡五月辛巳朔上御崇元殿受朝仗衛如式詔侍衛諸軍及諸道將士各賜等第優給應行營將士歿于王事者各與贈官親的子孫並量才錄用傷痍殘廢者別賜救接淮南諸州及徐宿宋亳陳潁許蔡等州所欠去年秋夏稅物並與除放云丙戌命端明殿學士竇儀判河南府兼知西京留守事辛卯以襄州節度使安審珂爲青州節度使以許州節度使韓通爲宋州節度使依前兼侍衛馬步都虞候以宋州節度使向訓爲襄州節度使以今上爲忠武軍節度

使依前殿前都指揮使淮南之役今上之功居最及是
命之降雖云酬勳止于移鎮而已賞典太輕物議不以
爲允癸巳以左武衛上將軍武行德爲鄜州節度使以
右神武統軍宋延渥爲滑州節度使小畜集宋延渥神
道碑云五月授義
成軍節度使其制略曰長驅下瀨之師若涉無人之境
除凶戡難爾旣立夫殊庸礪岳盟河予豈忘于豐報南
燕舊邦北闕伊邇河壖作翰遙臨白
馬之津穰下統戎卽鎮卧龍之地 以前同州留後王

暉爲相州留後乙未立東京羅城諸門名額東二門曰
寅賓延春南三門曰朱明景風畏景西二門曰迎秋肅
政北三門曰元德長景愛景辛丑幸懷信駟乙巳詔在
朝文武官各再舉堪爲幕職令錄一人戊申以襄州節

度使向訓兼西南面水陸發運招討使已酉以太府卿
馮延魯充江南國信使以衛尉少卿鍾謨爲副賜李景
御衣玉帶錦綺羅縠帛共十萬匹金器千兩銀器萬兩
御馬五匹金玉鞍轡全散馬百匹羊三百匹賜江南世
子李弘冀器幣鞍馬等別賜李景書曰皇帝恭問江南
國主煮海之利在彼海濱屬疆壤之初分慮供食之有
闕江左諸郡素號繁饒然于川澤之間舊無斥鹵之地
曾承素旨常在所懷願均收積之餘以助軍旅之用已
下三司逐年支撥供軍食鹽三十萬石又賜李景今年
歷日一軸六月庚午命中書舍人竇儼參定雅樂辛未

放先俘獲江南兵士四千七百人歸本國壬申有司奏御膳料上批曰朕之常膳今後減半餘人依舊癸酉禘于太廟乙亥兵部尙書張昭等撰太祖實錄三十卷成上之賜器帛有差丁丑以中書舍人張正爲工部侍郎充江北諸州水陸轉運使戊寅詔諫議大夫宜依舊爲正五品上仍班在給事中之下秋七月癸未以右散騎常侍高防爲戶部侍郎以驍衛上將軍李洪信爲右龍武統將軍以左領軍上將軍李繼勳爲右羽林統軍以工部尙書田敏爲太子少保以刑部侍郎裴巽爲尙書左丞以左武衛上將軍薛懷讓爲太子太師以右羽林

大將軍李萼爲右千牛衛上將軍自敏已下皆致仕丙戌中書門下新進冊定大周刑統奉勅班行天下丁亥賜諸道節度使刺史均田圖各一面唐同州刺史元稹在郡日奏均戶民租賦帝因覽其文集而善之乃寫其辭爲圖以賜藩郡時帝將均定天下賦稅故先以此圖徧賜之五代會要載原詔云朕以寰宇雖安蒸民未泰當乙夜觀書之際較前賢卑俗之方近覽元稹長慶集見在同州時所上均田表較當時之利病曲盡其情俾一境之生靈咸受其賜傳于方冊可得披尋因令製素成圖直書其事庶王公觀覽觸目驚心利國便民無亂條制背經合道盡繫變通但要適宜所冀濟務繫乃勛舊共庇黎元今賜元稹所奏均田圖一面至可領也閏月壬子廢衍州爲定

平縣廢武州爲潘原縣壬戌河決河陰縣溺死者四十

二人辛丑幸新授青州節度使安審琦第癸酉邢州留
後陳思讓奏破河東賊軍千餘人于西山下斬首五百
級八月庚辰延州奏澁溪水漲壞州城溺死者百餘人
己丑太子太師致仕宋彥筠卒辛丑江南李景上表乞
降詔書不允九月丁己以太府卿馮延魯爲刑部侍郎
以衛尉少卿鍾謨爲給事中並放歸江南時延魯鍾謨
自江南復命李景復奏欲傳位于其世子弘冀帝亦以
書答之甲子賜江南羊萬口馬二百匹橐駝三百頭賜
兩浙錢俶羊五千口馬二百匹橐駝二十頭乙丑賜宰
臣樞密使及近臣宴于玉津園己巳占城國王釋利因

德漫遣使貢方物壬申天清節羣臣詣廣德殿上壽江

南進奉使商崇儀代李景捧壽觴以獻

宋類苑云湯悅父殷舉唐末有

才名本名崇義建隆初避宣宗諱改姓湯初在吳爲舍人受詔撰揚州孝先寺碑世宗親往駐蹕此寺讀其文賞歎及畫江議定後主遣悅入貢世宗爲之加禮自淮上用兵凡書詔多悅之作特爲典贍切于事情世宗每覽江南文字形于嗟嘆當時沈遇馬士元皆不稱職復用陶穀李昉于舍人其後用扈載率由此也冬十

月己卯以戶部侍郎高防爲西南面水陸轉運使將用

師于巴邛故也

宋史高防傳世宗謀伐蜀以防爲西南面水陸轉運制置使屢發芻糧赴鳳州

爲征討之備

丙戌邠州李暉移鎮鳳翔戊子幸迎春苑己丑

太常卿司徒詡以本官致仕壬辰帝狩于近郊癸巳前相州節度使王饒卒甲午左監門上將軍許文纘右千

牛上將軍邊鎬衛尉卿周延構並歸江南乙未詔淮南諸州鄉軍並放歸農丁酉遣左散騎常侍艾穎等均定河南六十州稅賦

五代會要載賜諸道均田詔曰朕以干戈旣弭寰海漸寧言念地征罕臻

藝極須並行均定所冀永適重輕卿受任方隅深窮治本必須副寡昧平分之意察鄉閭治弊之原明示條章用分寄任並令集事允屬推公

今差使臣往彼檢括餘從別勅十一月丁未朔詔翰林

學士竇儼集文學之士撰集大周通禮大周正樂從儼之奏也辛亥日南至帝御崇元殿受朝賀仗衛如式已未昭義李筠奏破遼州長清砦獲僞命磁州刺史李再興甲子帝狩于近郊十二月丁丑朔朗州奏醴陵縣玉仙觀山門中舊有田二萬頃久爲山石閉塞今年七月

十七日夜暴雷劈開其路復通己卯楚州兵馬都監武懷恩棄市坐擅殺降軍四人也丙戌詔重定諸道州府幕職令錄佐官料錢其州縣官俸戶宜停己丑楚州防禦使張順賜死坐在任隱落榷稅錢五十萬官絲綿二千兩也壬辰詔兩京及五府少尹司參軍各省一員六曹判司內祇直戶法二曹餘及諸州觀察支使兩藩判官並省甲子帝狩于近郊乙未鄧州劉重進移鎮邠州滑州宋延渥移鎮鄧州以前河中節度使王仁鎬爲邢州節度使以邢州留後陳思讓爲滑州留後己亥詔翰林學士今後逐日起居當直者仍赴晚朝是月江南李

景殺其臣僞太傅中書令宋齊丘僞兵部侍郎陳覺僞
鎮南軍節度副使李徵古等初帝之南征也吳人大懼
覺與徵古皆齊丘門人因進說于景請委國事于齊丘
景繇是銜之及吳人遣鍾謨李德明奉表至行在帝尋
遣德明復命于金陵德明因說李景請割江北之地求
和于我而陳覺李徵古等以德明爲賣國請戮之景遂
殺德明及江南內附帝放鍾謨南歸謨本德明之黨也
因譖齊丘等故齊丘等得罪放齊丘歸九華山覺等貶
官尋並害之景旣誅齊丘等令鍾謨到闕具言其事故

書

永樂大典卷八
千九百八十四

舊五代史卷一百十八終

舊五代史卷一百十八攷證

周世宗紀五丙戌右龍武將軍王漢璋奏攻海州 案
通鑑作丁亥王漢璋奏克海州歐陽史亦作丁亥取
海州是書祇載丙戌攻海州而不載取城之日疑有
闕文

丙午拔之 案歐陽史通鑑俱作丁未克楚州與是書
異五代春秋從是書作丙午

天長軍使易贊 易贊通鑑作易文贊

乙未殿前都虞候慕容延釗奏大破賊軍于東沛州

案通鑑作甲午延釗奏大破唐兵于東沛州與是書

異日

放先俘獲江南兵士四千七百人歸本國 案歐陽史
作四千六百人

十一月丁未朔詔翰林學士竇儼集文學之士撰集大
周通禮大周正樂 案歐陽史作十一月庚戌

舊五代史卷一百十八攷證

舊五代史卷一百十九

宋司空同中書門下平章事薛居正等撰

世宗紀第六

周書十

顯德六年春正月丁未朔帝御崇元殿受朝賀仗衛如式王子高麗國王王昭遣使貢方物己卯以翰林學士中書舍人申文炳爲左散騎常侍辛酉女直國遣使貢獻壬戌青州奏節度使陳王安審琦爲部曲所殺乙丑賜諸將射于內鞠場戊辰幸迎春苑甲戌詔每年新及第進士及諸科聞喜宴宜令宣徽院指揮排比乙亥詔禮部貢院今後及第舉人依逐科等第定人數姓名並

所試文字奏聞候勅下放榜云是月樞密使王朴詳定雅樂十二律旋相爲宮之法并造律準上之詔尙書省集百官詳議亦以爲可語在樂志二月庚辰發徐宿宋單等州丁夫數萬濬汴河甲申發滑亳二州丁夫濬五丈河東流于定陶入于濟以通清鄆水運之路又疏導蔡河以通陳潁水運之路乙酉詔諸道應差攝官各支半俸丙戌以翰林學士承旨尙書兵部侍郎陶穀爲尙書吏部侍郎充職詔升湖州爲節鎮以宣德軍爲軍額以湖州刺史錢僊爲本州節度使從兩浙錢俶之請也辛丑幸迎春苑甲辰右補闕王德成責授右贊善大夫

坐舉宮不當也詔賜諸道州府供用糧草有差三月庚

申樞密使王朴卒甲子詔以北虜未復取此月內幸滄

州以宣徽南苑使吳延祚爲權東京留守判開封府事

以宣徽北院使咎居潤爲副使以三司使張美爲大內

都部署

東都事略張美傳世宗北征以美爲大內都點檢

命諸將各領馬步諸

軍及戰棹赴滄州己巳濠州奏鍾離縣飢民死者五百

九十有四癸酉詔廢諸州銅魚

五代會要顯德六年勅諸道牧守每遇除移特

降制書何假符契其請納銅魚宜廢之

甲戌車駕發京師夏四月辛卯車

駕次滄州以前左諫議大夫薛居正爲刑部侍郎是日

帝率諸軍北征壬辰至乾寧軍僞寧州刺史王洪以城

降丁酉駕御龍舟率舟師順流而北首尾數十里辛丑

至益津關

通鑑至益津關契丹守將終廷暉以城降

自此以西水路漸隘舟

師難進乃捨舟登陸壬寅宿于野次時帝先期而至大

軍未集隨駕之士不及一旅賴今上率材官騎士以衛

乘輿癸卯今上先至瓦橋關僞守將姚內斌以城降

平隆

集姚內斌平州人也世宗北征將兵至瓦橋關內斌爲關使開門請降世宗以爲汝州刺史

甲辰鄭

州刺史劉楚信以州來降

案鄭州之降通鑑從薛史作四月遼史作五月疑誤

五

月乙巳朔帝駐蹕于瓦橋關侍衛親軍都指揮使李重

進及諸將相繼至行在瀛州刺史高彥暉以本城歸順

關南平凡得州三縣十七戶一萬八千三百六十是役

也王師數萬不亡一矢邊界城邑皆望風而下丙午帝

與諸將議攻幽州諸將皆以爲未可帝不聽是夜帝不

豫乃止戊申定州節度使孫行友奏攻下易州擒僞命

刺史李在欽來獻斬于軍市乙酉以瓦橋關爲雄州

宋史

陳思讓傳得瓦橋關爲雄州以益津關爲霸州

宋史韓命思讓爲都部署率兵戍守

爲霸州都部署是日先鋒都指揮使張藏英破契丹數

百騎于瓦橋關北攻下固安縣詔發濱棣二州丁夫城

霸州庚戌遣侍衛都指揮使李重進率兵出土門入東

城界壬子車駕發雄州

案遼史作五月辛未周師退與薛史異通鑑從薛史作壬子

還京泉州節度使留從効遣別駕王禹錫奉貢于行在

舊唐書卷一百九

三

帝以泉州比臣江南李景方歸奉國家不欲奪其所屬
但賜詔褒美而已丁卯西京奏太常卿致仕司徒詔卒
己巳侍衛都指揮使李重進奏破河東賊軍于百井斬

首二千級甲戌上至自雄州

却掃編周世宗既定三關遇疾而退至澶淵遲留不

行雖宰輔近臣問疾者皆莫得見中外恟懼時張永德
爲澶州節度使永德尙周太祖之女以親故獨得至卧
內于是羣臣因永德言曰天下未定根本空虛四方諸
侯惟幸京師之有變今澶汴相去甚邇不速歸以安人
情顧憚旦夕之勞而遲回于此如有不可諱奈宗廟何
永德然之承間爲世宗言如羣臣旨世宗問誰使汝爲
此言永德對以羣臣之意皆願爲此世宗熟思久之歎
曰吾固知汝必爲人所教獨不喻吾意哉然觀汝之窮
薄惡足當此卽六月乙亥朔潞州李筠奏攻下遼州獲
日趣駕歸京師

僞刺史張丕旦

案通鑑作張丕

丙子以皇女薨輟朝三日戊寅

鳳翔奏節度使李暉卒鄭州奏河決原武詔宣徽南院使吳延祚發近縣丁夫二萬人以塞之庚辰命宣徽北院使胥居潤判開封府事晉州節度使楊廷璋奏率兵入河東界招降堡砦一十三所癸未立魏王符彥卿女爲皇后仍令所司擇日備禮冊命以王長子宗訓爲特進左衛上將軍封梁王以第二子宗讓爲左驍衛上將軍封燕國公賜江南進奉使李從善錢二萬貫絹二萬匹銀一萬兩賜兩浙進奉使吳延福錢三千貫絹五千匹銀器三千兩丁亥以前青州節度使李洪義爲永興節度使永興軍節度使王彥超移鎮鳳翔戊子潞州部

送所獲遼州刺史張丕旦等二百四十五人以獻詔釋之已丑宰臣范質王溥並參知樞密院事以樞密使魏仁浦爲中書侍郎平章事集賢殿大學士依前充樞密使以宣徽南院使吳延祚爲樞密使行左驍衛上將軍以宋州節度使侍衛都虞候韓通爲侍衛親軍副都指揮使加檢校太尉同平章事澶州節度使兼殿前都點檢駙馬都尉張承德落軍職加檢校太尉同平章事以今上爲殿前都點檢加檢校太傅依前忠武軍節度使帝之北征也凡供軍之物皆令自京遞送行在一日忽于地中得一木長二三尺如人之揭物者其上封全題

云點檢做觀者莫測何物也至是今上始受檢點之命
明年春果自此職以副人望則點檢做之言乃神符也
辛卯以宣徽北院使判開封事咎居濶爲左領軍上將
軍充宣徽南院使以三司使左領衛大將軍張美爲左
監門衛上將軍充宣徽北院使判三司東都事略張美傳美少爲三司
小吏澶州糧料使世宗鎮澶州每有求取美悉力應之
及卽位連歲征討糧餽無乏美之力也然每思澶州所
爲終不以癸巳帝崩于萬歲殿聖壽三十九甲午宣遺
公忠待之

制梁王于柩前卽皇帝位服紀月日一依舊制是日羣
臣奉梁王卽位于殿東楹中外發哀其年八月翰林學
士判太常寺事竇儼上謚曰睿武孝文皇帝廟號世宗

十二月壬寅朔葬于慶陵宰臣魏仁浦撰諡冊文王溥

撰哀冊文云

永樂大典卷八千九百八十四 五代史補世宗在民間嘗與鄴中大商頡跌氏忘

其名姓江陵販賣茶貨至江陵見有卜者王處士其術如神世宗因頡跌氏同往問焉方布卦忽有一著躍出卓然而立卜者大驚曰吾家筮法十餘世矣嘗記曾祖以來遺言凡卜筮而著自躍而出者其人貴不可言況又卓立不倒得非爲天下之主乎遽起再拜世宗雖佯爲詰責而私心甚喜于逆旅中夜置酒與頡跌氏半酣戲曰王處士以我當爲天子若一旦到此足下要何官請言之頡跌氏曰某三十年作估來未有不由京洛者每見稅官坐而獲利一日所獲可以敵商賈數月私心羨之若大官爲天子某願得京洛稅院足矣世宗笑曰何望之卑耶及承郭氏之後踐阼頡跌氏猶在召見竟如初言以與之世宗之征東也駐蹕于高平劉崇契丹之眾來迎戰時師多持兩端而王師不利親軍帥樊愛能等各退衄世宗赫然躍馬入陳引五十人直衝崇之牙帳崇方張樂飲酒以示閑暇及其奄至莫不驚駭失次世宗因以奮擊遂敗之追奔于城下凱旋駐蹕潞州

且出其不意以誅退衄者乃置酒高會指樊愛能等數
人責之曰汝輩皆累朝宿將非不能用兵者也然退衄
者無他誠欲將寡人作物貨賣于劉崇爾不然何寡人
親戰而劉崇始敗耶如此則卿等雖萬死不足以謝天
下宜其曲膝引頸以待斧誅言訖命行刑壯士擒出斬
之于是立功之士以次行賞自行伍拔于軍廂者甚眾
其恩威並著皆此類也初劉崇求援于契丹得騎數千
及觀世宗兵少悔之曰吾觀周師易與爾契丹之眾宜
勿用但以我軍攻戰自當萬全如此則不惟破敵亦足
使契丹見而我軍服一舉而有兩利兵之機也諸將以爲
然乃使人謂契丹主將曰柴氏與吾主客之勢不煩足
下餘刃敢請勒兵登高觀之可契丹不知其謀從之泊
世宗之陣也三軍皆賈勇爭進無不一當百契丹望而
畏之故不救而崇敗論者曰世宗患諸將之難制也久
矣思欲誅之未有其勢高平之役可謂天假故其斬決
而無貸焉自是姑息之政不行朝廷始尊大自非英主
其孰能爲之哉世宗既下江北駐蹕于建安以書召
僞主僞主惶恐命鍾謨李德明爲使以見世宗德明素
有詞辨以利害說世宗使罷兵世宗具知之乃盛陳兵
師排旗幟戈戟爲門頃道以湊御然後引德明等入見

世宗謂之曰汝江南自以爲唐之後衣冠禮樂舉世無比何故與寡人隔一帶水更不發一使奉書相問惟泛海以通契丹舍華事夷禮將安在今又聞汝以辭說寡人罷兵是將寡人比六國時一羣癡漢何不知人之甚也汝愼勿言當速歸報汝主令徑來跪寡人兩拜則無事矣不然則寡人須看金陵城借府庫以犒軍汝等得無悔乎于是德明等戰懼不能措一詞卽日告歸及見僞主具陳世宗英烈之狀恐非四方所能敵僞主計無出遂上表服罪且乞保江南之地以奉宗廟修職貢其詞甚哀世宗許之因曰叛則征服則懷寡人之心也于是遣使者賁書安之然後凱還論者以世宗加兵于江南不獨臨之以威抑亦諭之以禮可謂得大君之體矣陳搏陝西人能爲詩數舉不第慨然有塵外之趣隱居華山自是其名大振世宗之在位也以四方未服思欲牢籠英傑且以搏曾踐場屋不得志而隱必有奇才遠畧于是召到闕下拜左拾遺搏不就堅乞歸山世宗許之未幾賜之書勅陳搏朕以汝高謝人寰栖心物外養太浩自然之氣應少微處士之星旣不屈于王侯遂高隱于岩壑樂我中和之化慶乎下武之期而能遠涉山涂暫來城闕浹旬延遇弘益居多白雲暫駐于帝鄉好

爵難縻于達士昔唐堯之至聖有巢許爲外臣朕雖寡
薄庶遵前鑒恐山中所闕已令華州刺史每事供須乍
反故山履茲春序緬懷高尚尙當適所宜故茲撫問想宜
知悉卽陶穀之詞也初搏之被召嘗爲詩一章云草澤
吾皇詔圖南搏姓陳三峯十年客四海一閒人世態從
來薄詩情自得真超然居世外何必使爲臣好事者欣
然謂之答詔詩世宗以張昭遠好古直甚重之因問曰
朕欲一賢相卿試爲言朝廷誰可昭遠對曰以臣所見
莫若李濤世宗常薄濤之爲人聞昭遠之舉甚驚曰李
濤本非重厚朕以爲無大體卿首舉之何也昭遠曰陛
下所聞止名行曾不聞才畧如何耳且濤事晉高祖曾
上疏論汾州節度使張彥澤蓄無君心宜早圖之不然
則爲國患晉祖不納其後契丹南侵彥澤果有中渡之
變晉社殲焉先帝潛龍時亦上疏請解其兵權以備非
常之變少主不納未幾先帝遂有天下以國家安危未
兆間濤已先見非賢而何臣首舉之者正爲此也世宗
曰今卿言甚公然此人終不可于中書安置居無何濤
亦卒濤爲人不拘禮法與弟濬雖甚雍睦然聚語之際
不典之言往往間作濬娶禮部尙書竇寧固之女年甲
稍長成婚之夕竇氏出參濤趣望塵下拜濬驚曰大哥

風狂耶新婦參阿伯豈有咎禮儀濤應曰我不風只將
謂是親家母澣且慙且怒既坐竇氏復拜濤又义手當
胸作歇後語曰慙無竇建繆作梁山嵒嵒時聞者莫
不絕倒凡濤于閨門之內不存禮法也如此世宗以爲
無大臣體不復任用宜哉世宗志在四方常恐運祚
速而功業不就以王朴精究術數一旦從容問之曰朕
當得幾年對曰陛下用心以蒼生爲念天高聽卑自當
蒙福臣固陋輒以所學推之三十年後非所知也世宗
喜曰若如卿言寡人當以十年開拓天下十年養百姓
十年致太平足矣其後自瓦橋關回戈未到關而晏駕
計在位止及五年餘六箇月五六乃三十之成數也蓋
朴婉而言之世宗末年大舉以取幽州契丹聞其親
征君臣恐懼沿邊城壘皆望風而下凡蕃部之在幽州
者亦連宵遁去車駕至瓦橋關探邏是實甚喜以爲大
勳必集登高阜因以觀六師頃之有父老百餘輩持牛
酒以獻世宗問此地何名對曰厯世相傳謂之病龍臺
默然遽上馬馳去是夜聖體不豫翌日病急有詔回戈
未到關而晏駕先是世宗之在民間已常夢神人以大
傘見遺色如鬱金加道經一卷其後遂有天下及瓦橋
不豫之際復夢向之神人來索傘與經夢中還之而驚

起謂近侍曰吾夢不祥豈非天命將去耶遂召大臣戒以後事初幽州聞車駕將至父老或有竊議曰此不足憂且天子姓柴幽者爲燕燕者亦煙火之謂也此柴入火不利之兆安得成功卒如其言

史臣曰世宗頃在仄微尤務韜晦及天命有屬嗣守鴻業不日破高平之陣逾年復秦鳳之封江北燕南取之如拾芥神武雄畧乃一代之英主也加以留心政事朝夕不倦摘伏辯姦多得其理臣下有過必面折之常言太祖養成二王之惡以致君臣之義不保其終故帝駕馭豪傑失則明言之功則厚賞之文武參用莫不服其明而懷其恩也所以仙去之日遠近號慕然稟性傷于太察用刑失于太峻及事行之後亦多自追悔逮至末

年漸用寬典知用兵之頻併憫黎民之勞苦蓋有意于
康濟矣而降年不永美志不就悲夫

永樂大典卷八
千九百八十四

舊五代史卷一百十九終

舊五代史卷一百十九攷證

周世宗紀六甲辰鄭州刺史劉楚信以州來降○案鄭州之降通鑑從是書作四月遼史作五月疑誤

王子車駕發雄州還京 案遼史作五月辛未周師退與是書異通鑑從是書作壬子

皇長子宗訓 案恭帝宗訓通鑑注作第四子歐陽史漢家人傳世宗子七人長曰宜哥次二皆未名次曰恭皇帝是亦以宗訓爲第四子也是紀作皇長子蓋宜哥與其二皆爲漢誅指其現存者而長之耳

第二子宗讓 宗讓歐陽史作宗誼

獲僞刺史張丕旦 張丕旦通鑑作張丕

以宣徽南院使吳延祚爲樞密使行左驍衛上將軍

案歐陽史三月吳延祚爲左驍衛上將軍樞密使與
是書異通鑑從是書作六月

癸巳帝崩于萬歲殿 案歐陽史作滋德殿與是書異
五代會要五代春秋俱作萬歲殿與是書同

舊五代史卷一百十九攷證

舊五代史卷一百二十

宋司空同中書門下平章事薛居正等撰

恭帝紀

周書

恭帝諱宗訓世宗子也廣順三年歲在癸丑八月四日
生于澶州之府第顯德六年六月癸未制授特進左衛
上將軍封梁王食邑三千戶實封五百戶癸巳世宗崩
甲午內出遺制命帝樞前卽皇帝位是日羣臣奉帝卽
位而退丁酉北面兵馬都部署韓令坤奏敗契丹五百
騎于霸州北戊戌文武百寮宰臣范質等上表請聽政
表三上允之壬寅文武臣寮上表請以八月四日爲天

壽節從之癸卯以司徒平章事范質爲山陵使以翰林
學士判太常寺事實儼爲禮儀使以兵部尙書張昭爲
鹵簿使以御史中丞邊歸讜爲儀仗使以宣徽南院使
判開封事咎居潤爲橋道頓遞使是月州郡十六奏大
雨連旬不止秋七月丁未以戶部尙書李濤爲山陵副
使以度支郎中盧億爲山陵判官辛亥左散騎常侍申
文炳卒乙卯右拾遺徐雄奪三任官坐誣奏雷澤縣令
虛破戶也丁巳百寮釋服尙輦奉御金彥英本東夷人
也奉使高麗稱臣于夷王故及于罪庚申以邢州節度
使王彥鎬爲襄州節度使進封開國公以侍衛步軍都

指揮使曹州節度使檢校太保袁彥爲陝州節度使加
檢校太傅以右羽林統軍權知邢州事檢校太保李繼
勳爲邢州節度使加檢校太傅以滑州留後檢校太保
陳思讓爲滄州節度使以侍衛馬軍都指揮使陳州節
度使檢校太傅韓令坤爲侍衛馬步軍都虞候依前陳
州節度使加檢校太尉以虎捷左廂都指揮使岳州防
禦使檢校司徒高懷德爲夔州節度使充侍衛馬軍指
揮使檢校太保以虎捷左廂都指揮使常州防禦使檢
校司空張鐸爲遂州節度使充侍衛步軍都指揮使檢
校太保仍改名令鐸

宋史張令鐸傳云本名鐸以與
河中張鐸同姓名故賜今名

壬

戊以鄆州節度使充侍衛馬步軍都指揮使檢校太傅兼侍中李重進爲淮南節度使檢校太尉兼侍中依前侍衛馬步軍都指揮使以襄州節度使檢校太尉同平章事向拱爲河南尹充西京留守加檢校太師兼侍中

通鑑向拱卽向訓也避恭帝名改焉

以宋州節度使充侍衛馬步軍副都

指揮太尉同平章事韓通爲鄆州節度使依前侍衛親軍馬步軍副都指揮使以澶州節度使檢校太尉同平章事駙馬都尉張永德爲許州節度使進封開國公以今上爲宋州節度使依前檢校太尉殿前都點檢進封開國侯以淮南節度使兼殿前副都點檢檢校太保慕

容延釗爲澶州節度使檢校太傅依前殿前副都點檢
進封開國伯以殿前都指揮使江州防禦使檢校司空
石守信爲滑州節度使檢校太保依前殿前都指揮使
丙寅制大赦天下庚午翰林學士判太常寺竇儼撰進
大行皇帝太室酌獻歌辭舞曰定功之舞歌辭不錄是
月諸道相繼奏大雨所在川渠漲溢漂溺廬舍損害苗
稼八月甲戌朔以光祿卿致仕柴守禮爲太子太保致
仕乙亥翰林學士兼判太常寺竇儼撰進大行皇帝尊
諡曰睿武孝文皇帝廟號世宗從之庚辰天下兵馬都
元帥守尙書令兼中書令吳越國王錢俶加食邑一千

戶實封四百戶改賜功臣天雄軍節度使檢校太師守
太傅兼中書令魏王符彥卿加守太尉夏州節度使檢
校太師守太保兼中書令西平王李彝興加守太傅荆
南節度使檢校太師守中書令南平王高保融加守太
保壬午山陵使范質撰進大行皇帝陵名曰慶陵從之
秦州節度使西面沿邊都部署檢校太師守中書令褒
國公王景進封涼國公徐州節度使檢校兼中書令郭
從義加開府儀同三司鄜州節度使檢校太師兼中書
令邢國公武行德進封宋國公永興軍節度使檢校太
師兼侍中李洪義加開府儀同三司鳳翔節度使檢校

太尉兼侍中郭崇加檢校太師潞州節度使檢校太傅
兼侍中李筠加檢校太尉朗州節度使檢校太尉兼侍
中周行逢加檢校太師甲申壽州節度使檢校太師同
平章事韓國公楊信封魯國公邠州節度使檢校太師
劉重進廬州節度使檢校太尉趙贊鄧州節度使檢校
太尉宋延渥並加開府儀同三司涇州節度使檢校太
尉白重贊河中節度檢校太尉張鐸並加階爵丙戌易
定節度使孫行友靈州節度使馮繼勳府州節度使折
德展並自檢校太尉加檢校太傅進階爵以延州留後
檢校太傅李萬全爲延州節度使進封開國公庚寅皇

弟特進檢校太保左驍衛上將軍燕國公食邑三千戶
宗讓加檢校太傅進封曹王改名熙讓熙謹可光祿大
夫檢校太保右武衛大將軍封紀王食邑三千戶皇弟
熙誨可金紫光祿大夫檢校司徒左領衛大將軍封蘄
王食邑三千戶制下卽令所司擇日備禮冊命以晉國
長公主張氏爲晉國大長公主以前陝州節度使檢校
太尉藥元福爲曹州節度使進階爵甲午守司徒同平
章事弘文館大學士參知樞密院事范質加開府儀同
三司進封蕭國公門下侍郎兼禮部尙書同平章事監
修國史參知樞密院事王溥加右僕射進封開國公樞

密使中書侍郎同平章事集賢殿大學士魏仁浦加兼
刑部尙書依前樞密使檢校太傅右驍衛上將軍吳延
祚依前樞密使進封慶國公以左武衛上將軍史佺爲
左金吾上將軍致仕乙未以隴州防禦使王全斌爲相
州留後戊戌宣徽南院使判開封府事咎居潤宣徽北
院使判三司張美並加檢校太傅己亥前司空李穀加
開府儀同三司趙國公以前太傅少卿朱渭爲太僕卿
致仕辛丑左金吾上將軍致仕史佺卒壬寅高麗國遣
使朝貢兼進別序孝經一卷越王孝經新義一卷皇靈
孝經一卷孝經雌圖三卷

文昌雜錄云別序者記孔子
所生及弟子從學之事新義

者以越王爲問目釋疏文之義皇靈者止說延年避災之事及符文乃道書也雖圖者止說日之環暈星之彗李亦非

九月壬子前滄州留後李彥穎卒乙卯高麗王

奇書

王昭加檢校太師食邑三千戶丙辰以三司副使王贊爲內客省使兼北面諸州水陸轉運使癸亥前開封縣令路延規除名流沙門島先是延規有過停任有司召延規宣勅拒命爲憲司所案故有是命甲子以端明殿學士禮部侍郎竇儀爲兵部侍郎充職以尙書戶部員外郎直樞密院杜華爲司門郎中充樞密直學士賜紫以翰林學士尙書度支員外郎王著爲金部郎中知制誥充職仍賜金紫是日翰林學士尙書屯田郎中知制

誥李昉都官郎中知制誥扈蒙水部郎中知制誥趙逢
並加柱國賜金紫乙丑兵部尙書張昭進封舒國公戶
部尙書李濤進封莒國公以太子詹事劉溫叟爲工部
侍郎判國子祭酒事是月京師及諸州郡霖雨踰旬所
在水潦爲患川渠泛溢冬十月癸酉朔以司農卿致仕
李鍇爲太僕卿致仕太常少卿致仕姚遂爲將作監致
仕丁亥太子太師薛懷讓封杞國公壬辰翰林學士判
太常寺事竇儼撰進貞惠皇后廟歌辭丁酉世宗皇帝
靈駕發引戊戌以前相州留後王暉爲右神武統軍辛
丑江南國主李景來告世子弘冀卒遣御厨使張延範

充弔祭使十一月壬寅朔葬世宗皇帝于慶陵以貞惠
皇后劉氏祔焉戊申西京奏太子太師致仕白文珂卒
丙辰日南至百寮奉表稱賀戊午廢兗州廣利軍依舊
爲萊蕪監壬戌升鳳州固鎮爲雄勝軍丙寅左羽林統
軍馬希崇案原本有脫誤十二月壬申朔史館奏請差官修撰
世宗實錄從之甲戌改萬歲殿爲紫宸殿甲午西京奏
左屯衛上將軍致仕李萼卒乙未大霖晝昏凡四日而
止分命使臣賑給諸州遭水人戶

顯德七年春正月辛丑朔文武百寮進名奉賀鎮定二
州馳奏契丹入寇河東賊軍自土門東下與蕃寇合勢

詔今上率兵北征癸卯發京師是夕宿于陳橋驛未曙
軍變將士大譟呼萬歲擐甲將刃推戴今上升大位扶
策升馬擁迫南行是日詔曰天生蒸民樹之司牧二帝
推公而禪位三王乘時以革命其極一也予末小子遭
家不造人心已去國命有歸咨爾歸德軍節度使殿前
都點檢趙

案原空
二字

稟上聖之姿有神武之畧佐我高祖

格于皇天逮事世宗功存納麓東征西怨厥績懋焉天
地鬼神享于有德謠謠獄訟附于至仁應天順民法堯
禪舜如釋重負予其作賓嗚呼欽哉祇畏天命今上于
是詣崇元殿受命百官朝賀而退制封周帝爲鄭王以

奉周祀正朔服色一如舊制奉皇太后爲周太后

續通鑑長

編建隆三年周鄭王出居房州

皇朝開寶六年春崩于房陵今上聞之

震慟發哀成服于便殿百寮進名奉慰尋遣中使監護

其喪

續通鑑長編開寶六年三月乙卯房州上言周鄭王殂上素服發哀輟視朝十日

以其年

十月歸葬于世宗慶陵之側詔有司定諡曰恭皇帝陵

曰順陵

永樂大典卷八千九百八十九續通鑑長編仁宗嘉祐四年詔有司取柴氏譜系于諸房中推

最長一人令

歲時奉周祀

史臣曰夫四序之氣寒往則暑來五行之數金銷則火

盛故堯舜之揖讓魏之傳禪皆知其數而順乎人也

況恭帝當統緒之冲年會笙鏞之變響聽謳歌之所屬

知命厯之有在能遜其位不亦善乎終諡爲恭固其宜

矣

永樂大典卷八
千九百八十九

舊五代史卷一百二十終

舊五代史卷一百二十攷證

周恭帝紀恭帝諱宗訓世宗子也 案五代會要云世宗後宮所生歐陽史作不知其母爲誰氏今附識于此

孝經雌圖三卷 三卷歐陽史作一卷

舊五代史卷一百二十攷證